


PL  
2705  
0855  
1925  
V. 1





書王序

史稱劉穆之決斷如流目覽手裁耳聽目答五  
官並用靡不瞻舉乎初心疑之以爲世安有若  
人徒虛語耳及從樵園先生游始信人之才分  
相越真非意量所及愧予猶榆枋之見也先生  
言語妙天下文章風雅冠絕當時學者尊之者  
泰山歸之者百川之赴海子求髮受書時已讀  
先生之文震先生之名不啻蘇軾見時之于韓  
范富歐陽也徒以不獲游其門爲恨今宋金陵





書影序

史稱劉穆之決斷如流目覽手裁耳聽口答五官並用靡不瞻舉予初心疑之以爲世安有若人徒虛語耳及從櫟園先生游始信人之才分相越真非意量所及媿予猶榆枋之見也先生言語妙天下文章風雅冠絕當時學者尊之若泰山歸之若百川之赴海予束髮受書時已讀先生之文震先生之名不啻蘇軾兒時之于韓范富歐陽也徒以不獲游其門爲恨今來金陵



始得執贄相與素心晨夕而益歎先生之不可及也江南機務旁午文書紛紛几案日盈數尺強半米鹽凌雜人格格不能通者先生觸目洞中機要剖決若神風行電掣倏忽立盡四方郵問日至殊苦酬贈先生應時裁答靡有倦容或索詩及古文辭揮豪輒就文不加點而辭采爛然朝夕一編手批口哦窮年矻矻唯以著述爲事嗚呼偉矣今士大夫旣登仕版便謝去藝文日不暇給間或寄情風雅吏事不無廢閣兩者



恒不能相兼先生於簿書鞅掌中獨能縱橫百  
家舍英咀華無吏事之勞而偏得文事之樂其  
才不有大過人者乎先生所著書甚富半已懸  
諸國門茲復有書影之刻書影者先生請室中  
所爲作也先生樂天知命不以得喪撓其心胸  
汲汲乎名山是問與玉門之演易潁川之受尚  
書何以異顧予竊有感焉太史公作史記中多  
憤懣一篇之中時時見意論者謂其學道未深  
先生當是時較之太史公其安危相去徑庭使



他人當此必盡寫其牢騷不平之感先生澹然  
絕無幾微之形于筆墨其勝古人遠矣今試取  
其書讀之凡古今來未聞未見可法可傳者靡  
不博稽而幽討陸離光怪莫可端倪然其大指  
在乎正人心維名教感人之性情益人之神智  
長人之學問非徒張華博物千寶搜神但矜詭  
異爲也顧先生退然不敢自居取昔人所云老  
年人讀書僅存書影子于胸之義故名曰影不  
知深入其阻固已取書之神與髓昭昭乎若揭



日月而行矣集成先生語予曰子曷爲我序之  
予烏足以序先生姑識其景服乎先生者如此  
康熙六年歲次丁未季夏山陰後學姜承烈頓

首撰

書影

丁

三

三



書影序

識古人事易論古難論古人事易論今事難  
人往矣不盡讀其書不能知也盡讀其書而辭  
有異同傳有疑信文有燕郢帝虎之譌雜奚從  
而辨之此不存其學存其識也至今人之事其  
散軼者既不能如古人之備有其書而其異同  
難信之跡出於道路之沿襲與夫門戶意見之  
私阿互齟者其誦謬視古益甚吾既取而論斷  
之而天下後世之責將在於吾可聽其荒略失

據與以私臆袒而左右之乎此又不獨存乎其  
識存其所學之道識不足駕古人之上卽不免  
爲古人所欺道不足以折古今之至當而定其  
指歸卽學與識皆足佐我之眩亂馳騁而有以  
駁益舛之患欲以成一家之言難矣夫以一人  
之心目網羅千百世之逸事微言於瑣組雜綴  
之中皆不失乎羽經翼傳之意書若是可以傳  
矣吾求之世未數數然也往讀櫟園同書難其  
連類廣而取裁約所資於來學不小也近復得



其恕老堂書影若干卷其類益侈而裁益密其  
例無所專屬要於文之瑰奇無不收理之疑殆  
無不析說之荒唐牴牾無不正至於事繫人心  
義關名教挖掇反覆意尤摯焉甚矣櫟園之書  
之合乎道也夫文鼠之異彭猴之怪終軍陸敬  
叔識之魯襄之鑄鼎新莽之威斗釋道安何承  
天辨之古之洽聞強識不謂無人而成書者少  
茂先博物之志景純山海之經成書矣然齊諧  
志怪之屬於世無益也王充著論衡十餘萬言

蔡中郎至秘之帳中辨折雖詳而龐蹟不免劉  
子元史通一書可云獨抒所見然中所援據多  
汲冢瑣語之類雖非無益於世所學未醇也近  
世淹雅之儒無如楊升菴王弼州升菴癖異聞  
而義時傷鑿弼州熟掌故而指閒入偏其他詹  
言曲說眈眈瑣瑣又無譏焉豈非廣撫者病易  
誣獨斷者失多僻論古事旣苦其見之不實論  
今事又患其見之不虛乎豈不難哉豈不難哉  
櫟園是書其殆庶幾也由其博綜以觀其學由



其精核以觀其識由其指歸之醇折衷之當以  
觀其道近代來書之成一家言而可傳者必於  
是也櫟園天才絕世其詩文皆卓然大家卽以  
雜著此其劍首一映耳而富如此然又成之請  
室之因樹屋中他人之黯慘喪魄者櫟園遇之  
皆其筆墨沉酣之助昔馬遷困蠶室而史記成  
虞卿棄相印而春秋出古之著書立言者往往  
得之憂患櫟園罹非意而成是書櫟園之書成  
而事大白是書之益乃在天下來世嗚呼豈偶

然哉盱江年社弟徐芳拜手書



跋書影後

夫考古證今莫如說部然稗官家不可勝舉逞  
逞野語瑣錄謬舛尤甚至流濫于齊諧虞初搜  
神志怪君子不由也王仲任有言造論著說發  
胸中之思剖世俗之事斯爲善耳所誤論衡識  
者且鄙劣之迨宋元來淹通古雋唯容齋隨筆  
夢溪筆談研北雜志數書稱焉今櫟園先生因  
樹屋書影出采風論世辨誣正譌皆足羽翼經  
史精確切用淵雅可傳洵百家之眞珠船一代

之名山業也先生是編成於請室時簡閱無書  
就腹笥而成之故有書影之目然猶淹通若此  
則其居恒捉麈尾擊唾壺慷慨談論之風槩不  
于是而益可想見也哉武林晚學張遂辰拜手  
跋



書影跋

因樹屋書影者櫟園先生昔在請室時所撰述也其書紀載精覈辨証明悉上自經史下逮聞見凡可以正人心翼世教廣學識弘風雅者無不筆而記之洵五經之流別四部之菁華矣昔人有志林隨筆紀聞諸書皆足以備攷訂益神智豈若是書之博覈而正大耶先生事旣白復官金陵公子雪客龍客爰發舊篋取曩編而剞劂之以質當世儀于丁未十月旣望覲公於秦

淮公飲之酒酒間因得是書卒讀之儀披覽再  
四不徒歎先生是書之博大而深服先生之天  
定而道全也夫人小有利害則聰明憤亂舉動  
率失其常儀求其從容如平時也實難至欲其  
親篇卷操鉛槧著盈尺之書而死生禍福絲毫  
不以介於衷者自非天定而道全其孰能幾于  
此昔先生之獄事蓋亦急矣其利害所關在恒  
人未有不動于中者廼坐因樹屋中泊然守靜  
如深山人露抄雪纂於桁楊影中孳孳不輟



未及浹旬著書早已成帙衛士覩公有太息  
下者聞候讞之日銀鐙被體尚搦管作送客詩  
翌日而流傳都門嗟乎此豈勉強而爲之耶吾  
有以知先生之天定而道全故患難不足怵而  
確然自持其所是書之成養之厚也昔坡公爲  
黨人所構至遭縲紲徙瘴鄉而讀書不倦渡海  
之儋耳之夜星月皎然公于舟中書賦不錯一  
字非其素守豈能至斯以方先生正復如是故  
讀是書者漫以新都之雜著相况非知先生者

也卽是書之博覈正大後學指南端在於是而  
自擬以老人讀書祇存影子者蓋先生之謙而  
又謙也夫吳郡受業鄧漢儀拜撰



書影跋

君子欲彙撮宙合一部以上下古今羅列于寸管之中而現至廣至大之界以成一家言剿非學足博古今之書識足論古今之人才足斷古今之事未可以輕言此也合古今之書之人之事融徹于一人之心胸而衷以其學其識其才然後可以立言而包含萬象貫綜百家闡雲雷而揭日月所謂廣大悉備者古今以來不數數見也蓋立言者自經史外類書說部種種間出

類家惟取編輯散在牙籤說家煩簡不一而取  
義各岐或以徵異或以誌怪或以拾遺或以叢  
談非無其學而學不醇正非無其才其識而才  
識不高不卓雖成一家之言而無當於廣大悉  
備之旨也卽如仲長統論說古今及當時行事  
著名曰昌言然恒出于發憤嘆息其義廣而不  
大文軫以老嫗信書三卷本三統五行多測解  
之類其義大而不廣若晏殊要略於六藝一史  
諸子之書騷人墨客之文至于地志族譜佛老



方技之衆說及九州之外荒忽詭變奇跡之序  
錄皆撫尋抽繹而終于三才其義似近於廣大  
矣然又不可與吾叔 櫟翁所著書影齊量而  
觀者也書影一編網羅天下放失舊聞窮天人  
之際究事物之變考數卽以證理搜奇卽以辨  
道其示勸也隱而彰其示懲也直而溫其綜核  
也簡而盡史而文如問以秘閣四部之書自甲  
至丁各說一事者然且標其源流節其文章在  
傳留者不沒其舊淹軼者復闡其新大約博古

今書論古今人斷古今事而其立言之意出於  
易簡之善是先具一天地於胸中而後得廣大  
悉備之旨易曰以言乎遠則不禦以言乎邇則  
靜而正以言乎天地之間則備矣抑聞其書成  
於請室非必規規于玉門演易說難孤憤等類  
而爲之也以吾叔之學之識之才亦何間于常  
變卽在請室追述見聞熊熊炎炎而胸中之天  
地出焉若上下古今羅列于寸管之中而現至  
廣至大之界以成一家言者昔楊升庵號稱博



物遠在遷謫而備誌生平所得不啻左右萬卷  
其隨地著述取諸懷來無不具足大與吾叔相  
類然 櫟翁曰吾之爲此不過讀書影子已耳  
是何存乎見少之詞哉夫讀書之敏捷於影響  
則有之寃極精微等於測影之妙則有之且古  
之君子之著書也猶木之有枝葉也木有枝葉  
尚能蔭庇人矧君子之著書乎影廣則蔭庇亦  
廣影大則蔭庇亦大然則書影之廣大悉備其  
蔭庇天下後世又寧有旣哉金沙小姪銘鹿峰

氏拜書於讀畫樓



書影序

阜嘗上下千百年間見古人卷帙繁浩頗不以  
此自困詘每謂雄奇奧祕可以抒理解而安性  
情者古文中不過數十家其餘佐人聞見得從  
泛覽流觀盡其勝者多不過百數十家廣及數  
百家而止而至于雜家瑣碎往往不耐蒐討雖  
強爲涉目亦終不及領其旨趣繙未數葉輒厭  
置之不少惜至誌林說部之篇見有雷同傳會  
牽拘文義相爲聚訟不止者則爲頭岑岑痛領

古人請用從火之言爲極快而于櫟園周先生  
書影一集則不能不撫几歎絕也櫟園先生目  
空千古持論之嚴于昔人著述不輕許不翅與  
予同而兼採博涉雖繁蕪之言不憚從千百中  
茹其一二如揚粃糠而得嘉粟披砂礫而獲良  
金間有紕繆經其搜摘則亦莫不有精旨可思  
適于道妙歲在庚子從請室中歷溯生平聞見  
加以折衷詮次成編一時見者以爲可資談助  
廣異苑而阜獨以此非博物之紀而明道之書



也夫至理之在天地不名一類而未始遺一跡  
故經雅宏訓恒昭昭婦姑箕帚間而桐華虹見  
之微卽深明化事之終始誠于是書而求之可  
以啟人疑情可以資人冥悟直使作者當日字  
字歸于無有而一以縣解爲大通使古人之著  
述盡若斯也予將窮年盡氣以恣探之不暇又  
何至有廢卷之歎乎歷稽古之以述作名家者  
王充論衡之編蔡邕獨斷之著皆輯自燕閒從  
容鉛槧而下蠶室而成書如漢代子長率多寫

其憤激不平之槩惟櫟園先生以安閒出之雜  
以詼諧半皆風趣若不知身在銀鐺響答間者  
其神全者其天定鬼神不得而禍之也又先生  
所著賴古堂詩其成自請室者皆感動人天一  
時驚歎未有跡先生生平功名多顯于戎馬倥  
偬時而文章則盛之乎析楊禍變之際蓋其人  
之自負磊落者天恒不欲以逸豫稱其材而磨  
勵于艱難百折中者必有非常之觀以卓爍古  
今而不敝也阜觀先生居官勤敏綜束吏民無



遺慮簿書之餘偶有暇刻卽手一編不輟甚至  
叅拜大僚酬訪賓客坐輿幙中往來市肆雜沓  
猶以哀然十數卷自隨歸語同人輒能舉其詳  
曲雖甚久遠偶晰一字之疑引據証明必指其  
出何書載何卷以及行墨之次第簡牘當命掌  
記依檢應手而出不差累黍而阜讀書疎略隨  
卽健忘偶有所得止能麤識大意至有詢其姓  
名而茫然不復記憶者人之度量相越千百倍  
蓰而無算固有如是之不爽也其獲成是書爲

一代奇觀豈偶然也哉而先生顧顏以書影雖  
先生自道之詞爾爾乃其欲讀者因表測日緣  
鑑窺形是書之傳神固在阿堵中也雖然先生  
所著古文詞起衰救敝尤爲當今第一以不肯  
輕出示世世尚未得覩其全然觀是書網羅之  
博採擇之精文筆之高古亦可以想其槩矣于  
書影之告成事也因書之以爲序高阜頓首題



書影序

夫齊諧者志怪者也書影者志信者也志怪者爲存人耳目之所未經志信者爲存已耳目之所已經以發人耳目之所未經則櫟園先生之書可以傳矣或曰讀書者務在精熟賈山涉獵遂不得爲醇儒至一生聞見或師友之口義或父老之傳說小落影響則疑而當闕影之義何居乎余曰影者刑之微而神之著者也月麗於上山河大地麗於下影入於月而有象蓋天澤

氣通而其中之幼渺難名澹涵莫盡者形微神  
著故相摩而成文此造物者之善於用虛者也  
書以影名此先生之善於用虛而實天下之腹  
者也世人胸中有疑難事便格格而不能忘及  
至可忘則竟忘之矣讀書亦然雖博聞強記或  
一行作吏久廢誦習則向之所存焉者寡矣及  
至可忘竟忘之影也云乎哉至若一卷未終恍  
已迷其姓氏數行纔過已不辨其偏旁鹵莽而  
耕之其寔自以鹵莽而報之偶逢問難則如墜



雲霧苦行思索則邈若山河止向人作大家兒  
笑耳人能卽其影而存之以至成書每一展觀  
如見爲兒嬉戲時物如逢數十年相別友生未  
有不躊躇眷戀以至感而悲悲而喜且交併者  
也抑先生爲是書時在請室尤爲人所難昔蘇  
文忠公被讒繫獄神宗使人夜聽之謂必展轉  
不寐及至則鼻息如雷知其胸中無事乃赦之  
張無垢晚年謫橫浦其寢室有短窗每日抱書  
立窗下讀洎北歸窗下石上雙趺之跡隱然先

生能於患難之際神氣恬然著書不輟殆文忠  
無垢之儔歟余受讀之實余腹矣意欲時時具  
少酒脯以酌此書率而飲之斗酒不足多也年  
家治寅弟杜浹頓首拜撰



書影序

古今四部載籍惟說家獨擅諸部之勝見於崇  
文諸目者幾半羣籍予束髮受書性喜流覽先  
人遺書數萬卷爲說類者不啻五之一文酒之  
餘從視北抽架上所藏如昔人賓退菽園餘冬  
筆塵諸錄亦未始不彬彬然開卷無幾輒思掩  
去是蓋有故作者聞見未廣則每以陳夙爲新  
妍記述無章又嘗以紛紜爲博洽下此而齊諧  
志怪瓊語藂談上之無當於身心次亦何關於

問學卽汗牛充棟亦書肆說鈴耳于立言之義  
謂何此其中求其能翼經詮史明道垂教檢束  
身心開發神智標新領異引人入勝者蓋未之  
有也惟宋王伯厚困學紀聞一書採擷前記發  
抒心得頗有可觀然猶憾其盱衡往籍而缺略  
新聞間亦有標舉之誤者千慮一失賢者不免  
則信矣著書之難也櫟翁先生天挺異質昔人  
所謂十行俱下過目不忘者庶幾近之故於載  
籍無所不窺且文心靈異筆能鏤空默識通微



精能挾髓目之所過手之所及方圭員璧隨遇  
而成其所著書影一編予嘗得而讀之如入武  
庫之中五兵縱橫無所不有廣而扶輿所磅礴  
近而日用所服習遠而千載之寥渺邇而聞見  
之親切大而經綸世業之理微而飛潛動植之  
情無不就所覩所記筆而著之於事之承訛襲  
舛者則正其謬戾於人之闇汶無章者則發其  
幽光以至夫古人深衷苦志或未白於當時及  
不諒於身後者無不爲之挾摘而表彰之闡揚

之信乎可以翼經可以詮史可以明道而垂教  
使讀之者有置身名檢之思有恢弘智意之益  
手之而惟恐其易盡盡之而但覺其可思誠譚  
苑之醍醐而說林之瓊寶也又豈困學諸書所  
可同日而語哉先生是書之成方在因樹屋中  
正先生貞固蒙難之日而猶且丹鉛不輟抽腹  
笥而成此編易曰樂天知命故不憂先生惟樂  
天故能著書亦惟著書益見其知命昔吾家次  
公隄冬從夏侯博士受尚書楊文定溥亦於非



所日誦五經其後登朝執政功業赫赫皆彼中所讀書也先生當雨雪漉漉之時而

天慈見覲復念舊德而柄用之行且登庸作輔如次公文定當年吾知必盡發抒其生平所學見之於天下其所謂明道立教者將堯舜君民而以知覺開其先可垂之爲經載之於史又不特翼之詮之而已也昔人言三不朽曰立德立功立言先生之不朽備矣又豈僅一著書立言已哉門人黃虞稷謹譔

書景

古



近日說部書雖多而四方文人學士獨思慕先君子書影欲期一見而不可得先君子著述十餘種是書則於請室中將生平所睹記有關於世道人心文章政事以及山川人物草木蟲魚可助見聞者皆隨筆記出成帙是時歲在己亥予小子年方七歲諸兄弟亦皆幼小棲息白下朝夕與先君子周旋吟咏無間者獨黃山吳君冠五諱宗信多才思尚氣節有古人風卽書中所列屯溪螺隱先生是也辛丑

先君子事白復職出爲江南督糧大叅丁未之冬刻

是書於金陵又五年辛亥一夕忽取賴古堂文集詩  
集印人傳讀畫錄閩小紀字觸賴古堂百種藏書並  
書影板燬之次年遂棄不肖等謝世矣嗚呼痛哉甲  
寅之秋當塗令寇公入會城訪予兄弟于賴古堂言  
幼時讀先君子闡墨及長讀詩古文思其人而不  
得見晤其後人如見櫟下先生焉又解囊刻賴古堂  
文集三十卷言辭真切義氣動人先君子知交甚  
廣身後如江南汪公舟次嗣君壺天閩南黎公愧曾  
嗣君寧先山左李公渭清李公鼎延俱戀戀故人不



忘數君子盡屬世好故興知己之思若當塗公則與  
先君子並無半面交而惓惓如此予兄弟茫然不知  
何以得此于寇君也後又遇江都文學汪子刻賴古  
堂詩集十卷其閩小紀等書西田燕客兩弟皆次第  
剞劂獨書影板燬已六十年家藏舊本盡爲友朋索  
去欲再覓一部收藏者珍重吝惜不與辛丑由汝寧  
之武昌道過固始於祝孝廉 齋中得數卷祝君  
文采風流輝映一時其令先祖山公先生 先君子  
莫逆交也壬寅于滁陽金子子位穀似昆仲予倩金

麗中外孫彞鉉案間得五冊猶缺卷之第三渡江訪  
棲霞高士張瑤星先生令孫敬思于白雲庵 先君  
子所敬禮者獨張公一人凡有著作必出以請政憶  
昔日未有不以是書奉教者但存亡則未敢必也敬  
思兄見予訪求甚苦欣然曰書影全部尚在什襲收  
藏宛然如新其中批閱一過皆高士君之親筆出以  
授予予再拜受之感激泣下而是書始得完全如初  
急欲梓行苦無其力甲辰菊月買舟東下訪吾家大  
令念吾君並其外舅胡公無波裔子 令兄挈一



于雲間諸君一見卽詢攜有書影乎尚不知其板已  
化爲灰燼久矣予小子述其始末俱深爲太息念五  
公知四方購求者之衆也慷慨捐俸命予重梓嗚呼  
先君子生平憐才愛士不減歐陽有一技一能者表  
揚不遺餘力惟恐其不傳所以諸編之外又有賴古  
堂印譜賴古堂近代古文選尺牘新鈔初集藏弄二  
集結隣三集牧靡四集名公對聯耦雋凡一句數行  
之可誦法必付之梨棗公諸海內復刻吾鄉張林宗  
王王屋王半庵江南邢孟貞顧與治林茂之吳野人

之遺詩西江王于一蘇武子之文集尤可異者西蜀  
楊升菴南昌朱鬱儀湖北應城陳心叔金陵張瑤星  
諸先生所著書數十百種取其書目合刻一冊意謂  
世間雖未能盡見其書得知其書之名足矣總欲傳  
其人于不朽真仁人之用心也今生平所自著作予  
小子愧不能流傳乃于無意中得之素未謀面之寇  
公于其先又得吾家大令于其後詩文廣布書影重  
光豈非 先君子一生憐才愛士之苦心天不欲磨  
滅故陰有以默相之亦令其託于好事諸君子之手



使得行今而傳後歟刻既成謹誌于篇末以見念吾  
商胡挈一諸公高誼周之子孫不可忘也憶昔年愛  
重是書勸先君子梓行而首序者爲姜君武孫係  
越水名家今念五諸君亦山陰人真異事也不特此  
也數年前于武昌晤郡伯章望廬先生同學胡君梅  
庄座間並詢先君子賴古堂印譜亦如訪書影之  
真切二公俱會稽世族雖千巖萬壑中自古多生俊  
傑或亦先君子與南鎮鏡湖山川人物有夙緣未  
可知也較正字跡圈點則張子敬思田子西疇同予

書影  
仲子用舉季子豐舉六子紹舉董梓以成則姪孫伯  
度學先之勞焉

皆


雍正三年三月三日不肖男在延百拜謹識於金陵之  
食舊菴



因樹屋書影

第一卷

櫟下老人筆記



屯溪螺隱校訂

先大人著述甚富常作觀宅四十吉祥相有益

於世道人心備錄於此案頭無淫書

昔人謂黃魯直

作艷詞以邪言蕩人心其罪非止墮惡道近日作小說人豈止艷詞非常報應人人親見之案頭如有片紙隻字當盡數焚却壞心術喪行止皆此等書引誘人家兒女豈無識字者略一回想豈不可懼架上無齊整書

本本精良一一完善手且未觸目於何有但觀

架上便座上有二三十年前老友堂中有七八

知腹中

卷之二

因樹屋

十年前古桌椅、門下有祖父遺畱麗眉皓首老

僕

如此方稱得世家

婦女不垂簾觀劇

粉氣髮香依依

簾中羅襪弓鞋隱隱屏下甚至品評坐客擊節

歌聲無所不至優人之目直透其中坐客之心

迴光其後

婦女不識字

列女閨範諸書近日罕見淫詞艷語觸目而是

故寧可使人稱其無才不可使人稱其無德至

世家大族一二詩章不幸流傳必列於釋子之

後娼妓之前

老妾孀婦不變作尼姑

其醜倍於改適不

豈不可取

呼優人同坐

宴客用優人但當呼之別院登場賜坐或尚在通融呼之同坐角飲

則褻甚矣今人敬優兒如師友殊令人訝即不

與之坐不過曰不在行而已天下事被在行二

字誤却

不在席上接優人曲不以筇并足代爲

多



擊板。擊板接曲去。外無狡童。內無老婢。無狡童。不惟省。

已防閑。抑且免人疑議。至禁錮老婢。不教婢子。

二十以外。尚不爲之擇配。尤傷陰陽。演劇。此亦奸人家兒女也。安忍其出。

醜裝牌榜。防閑尤難。作奸殊易。紙牌不入。

手中。近日馬弔盛行。士大夫儼然爲之不恥。予。

中几桌上。卽令此中有千變萬化。神妙不測。朕。

一思手持者何物。豈不愧殺。總之人不耐獨坐。

不肯習靜。奕碁變爲馬弔。不解新令。不爲酒糾。

風日下矣。與其馬弔寧奕。士人相聚。頗有可談。何至效青布商傭。吟嘯盈。

坐。寧受百罰。毋淪惡趣。予眼見以此生嫌疑者。

不。肯習醫卜。但能究心。心自入細。其子弟能畱。

少。席上不勸人。第二日補齋。卽此一事。便是與。

戒殺我不持齋彼能信心何苦必破其戒然專靠持齋免禍祈福亦謬僕從不與

主人同坐者并坐卽貧友疎親亦與主人同列何至與奴僕爲伍此風倡自

幾片主人得意時承奉奴僕惟恐少失其意殆失勢之後飲恨報復無所不至敗家受禍往往

由此凌晨客至僕從已拱立候命主人已盥沐相

迎乘朝氣則不夜飲可知不夜飲則奴僕無姦盜詐僞可知甚矣夜飲之害事也僕從

各隨其姓卽自幼僕子亦當令各姓其姓使人防微杜漸古人門前僕從見士人過毋論識與

有深意存其間不昧其宗祖卽後亦不致亂吾支派

不識皆起身直立遇諸塗皆側立讓行此雖細事然主

人忠厚不忠厚奴僕生事不生事皆由此而定不奴隸疎族窮親疎族窮親



無所歸代為贍養亦盛德事視不學蘇意薄云

同奴隸令供奔走大傷元氣

不離幫閒吃茶燒香總屬狡獪耳

口角無閨門事言之鑿鑿如曾日觀鬼神

在旁何不說得口中無刻薄尖酸議論先輩云一語而

略活動些子

傷天地之和一言而折

終身之福切須念之

先輩格言常在壁上口

頭存之於心則能體而行之矣

目凡夢俱可告

中口頭已有二三分受用處

人夢中所做所為常有不能告人者充至於凡

夢皆可以告人去道不遠矣古人驗心於夢

又云晝觀之妻子夜

十二歲以上小童不入內

驗諸夢寐有以哉

戶女童不出內戶

不可以小背為人宛轉寄家

信不浮沉已屬盛德更能宛轉以期必達尤陰

騭事以此類推凡事肯為人方便可知矣

能明佛理却不為邪說所誘、白蓮無為等教其初皆信心從佛者

先儒云精者不越吾儒此語尚可議若誕者吾不信則確不可易矣不明佛理與老嫗瞎磕頭

盲燒香者何異肯周濟貧親戚或助人婚嫁或代完官

贖却不做佛事不修建菴觀、總此一佛寺宇已多何必更建近日

私建私度甚多將來必有一僧難存是菴皆毀之慮畱心佛法者不可不知肯為人

說眼前報應肯聽人說報應諸事、眼前事報應顯明易見不

必說活閻王過陰人即不能奉行感應篇功過

諸事反增人不信心、肯看感應篇肯略略

格每日能體認所行善惡、體認功過格不必數

黃豆黑豆其人書館中小學生有讀四書小註

已有幾分好處



聲前輩無不讀小註者近日反目讀者爲迂矣  
子弟到老不明書旨皆由不明小註始讀小  
註子弟到後來上者無離經叛道  
之慮次亦免場中出醜東問西問不以病試醫  
肯將已驗醫方或鈔或刻施人  
不告醫者以得病之由令其暗中摸索取死之道也  
施方固勝施藥然能製數種藥常常施人尤善  
躬送破衣親友出門外  
在坐者間有躬送門外則以爲恥矣待失意人不難有恩而難有禮此語須體驗此等事最傷人心亦令人容易勘破你勢利心腸受人賀分卽一筭一絲無微不畱  
富貴受貧賤人禮以爲當然此大折福處亦大斂怨處須知其從當賣而來  
不磨祖父圖章刻作己名  
以此類推凡事無改可知

有贈祖父詩文者能舉其姓字習其篇章

亦孝子亦

韻人如此則能為

不戲謔父執貧友

既知其為父執又輕

祖父報德可知

之為貧人且有戲謔之不如

內聲不聞於外

言勿

論矣坐定不問新聞省却無限葛藤

司閤人回卑勿貧賤

親串惟恐傷其意

司閤人能如此不知費主人如許苦心矣

白鍾程

幼洪

邑

曰讀坦然周先生吉祥四十則防嫌於

微杜禍於漸外施家政內端女範長幼式訓上

下咸宜言擇行修立功寡過盪滌爬梳瑕疵淨

盡誠教家之良規檢身之寶鑑也易閑有家禮

嚴內則皆以齊家為端本澄源之要先生窺其



深矣。惠廸吉。惟順則吉。視履考祥。其旋元吉。所  
視必祥。斯爲吉徵。吉祥止止。則又止而不遷之  
義也。余願凡有家者。各書一通於座右。

新建徐世溥曰。癸酉以後。天下文治嚮盛。若趙  
高邑。顧無錫。鄒吉水。海瓊州。之道德。丰節。袁嘉  
興之窮理。焦秣陵之博物。董華亭之書畫。徐上  
海利西士之曆法。湯臨川之詞曲。李奉祀之本  
草。趙隱君之字學。下而時氏之陶。顧氏之冶。方  
氏。程氏之墨。陸氏攻玉。何氏刻印。皆可與古作

者同敝天壤而萬曆五十年無詩濫於王李佻  
於袁徐纖於鍾譚

南昌陳弘緒曰嘉隆以來帖括剽竊之陋流入  
古文一二負名之士好以秦漢相欺字裁句掇  
蕩然不復知所謂真古文吾黨憂之乃以唐宋  
諸大家力挽頽瀾母亦謂摹秦漢之失或至舍  
體氣而專字句而唐宋諸大家無從置力於字  
句之間也齊人先配林而後泰山晉人先庠池  
而後河若韓歐者固所由以適秦漢之路矣



徐巨源常言。今天下文章聲氣。可謂盛矣。雖然。日。午。月。望。有。道。者。所。不。居。異。日。必。有。以。刻。文。得。罪。功。令。數。十。里。不。敢。通。尺。書。者。已。而。婁。東。復。社。果。有。違。言。識。者。謂。巨。源。卓。識。

象山王子長

挺

曰。按逆濠之變。當時請密旨。捐

赤心。奮然不顧者。孫許二公而已。事既已底定。朝廷據在廷公論。廟祀之。厥後紛紛訾議。乃躋許於左。孫次之。夫人臣事君不幸當變。力盡則死。心安則死。死即分矣。復何言。復於既死而議。

之曰。某賢於某。豈不大謬哉。或曰。許欲先發。而  
孫暗焉。應之曰。逆濠之蓄遠矣。一旦稱兵。固其  
倉卒未定之謀。而安在其可先發哉。國家所以  
優禮宗藩。重典具在。萬一輕動。而彼或中輟未  
舉。豈惟不熄將沃之膏矣。當時孫公。惟務戢羣  
盜。以剪其羽翼。築城池。治甲兵。以堅吾之保障。  
如斯而已。或曰。許立而罵不絕口。以死於孫烈  
乎。應之曰。人臣之義。力盡則死。心安則死。死卽  
分矣。烏在罵不罵哉。睢陽之慷慨。於分奚加。文



山之從容。於分奚損。其趨一也。且聞孫公年餘六旬。方被縛時。羣盜吳十三等。素憾公。多計心焉。蓋未至死所。已拉折其脇。雖極楚毒。而公猶仰臥不爲屈。非志定而氣完者能之乎。二公者。生則相臨。死則相許。乃無故易位而處之。誠慮孫之未服。而許之未安也。聚食一堂之上。而使之一不服。一不安。豈所以通晝夜之故哉。此論甚正。究竟位置不知若何。張許之死。其時亦有異議。今雙忠亘古如生。而搖唇鼓舌者。竟何

往哉。昌黎書張中丞傳後云。小人好議論。不樂成人之美。今古一律。

艾千子曰。弘治之世。邪說興。勸天下士無讀唐以後書。驕心盛氣。不復考韓歐大家立言之旨。又以所持既狹。中無實學。相率取司馬遷班固之言。摘其字句。分門纂類。因仍附和。太倉歷下兩生。持北地之說。而又過之。持之愈堅。流弊愈廣。後生相習爲腐勦。至今未已。南城圭峰羅文肅公。當邪說始興之日。矯俗自正。力追古大家。



體裁當時以爲直逼柳州天下後進讀公之集

始知刻厲爲文不襲陳言不厭薄韓柳以爲可

師者皆公之力也。

文肅公集初刻於盱郡再刻南國子監武進淇澳孫公亦

有選本近其元孫栗士復刻於家較諸刻稍備

艾千子曰麻城周伯譽名世遴生於時文軟靡

勦襲之時學者莫不記誦帖括苟趨一世伯譽

獨按古經術之旨而佐以歐曾以下百家傳記

之長楚中開風氣之先者自伯譽始死時年二

十七梅惠連旣爲梓其詩文及制菰王岷生常

書影  
攜其詩文、流通江淮吳越間、然當伯譽稿未行時、談節父刻之吳門、爲兩進士稿、行於世、兩進士之名、隨而噪甚、原節父之意、以伯譽未知名、欲以進士重伯譽耳、旣而皆知爲伯譽也、

蘭陽王王屋、初名澤久、字春脚、後更名斤、母李氏孕公、公鳴於腹、生而敏給、善諧謔、里中人率以爲狂士也、舉於鄉、戊辰計偕、度已文必入彀、某公方分較春秋、某方與璫涉、公不欲出其門、論中故爲談語、首云、儂竊觀天下之事云云、中



間論鬼神處突曰如以爲無則慧娘之敲裴生之門也。麗娘之入柳生之室也。撒棘後則某果已魁公。及閱所爲論始有病狂喪心之評。後某終以璫累里人。始知公非狂者。辛未公仍以春秋魁多士。除滋陽令。公銳自見。又倅急剛鯁。會王孫市礫人。公執笞。獄行立忤諸王孫。黨構之。直指弗察。暴劾公。檻車徵繫。公雖廿日。令然頗有惠聲。其逮也。士民數千人。攀轅痛哭。白日慘黯。遮翹緹騎。自卯至申。不得前。甚有矐矐孤貧。

鳩杖鵝衣。亦視力投金錢。檻車驢之。且環而稽  
首。緹騎曰。無苦令令清苦。官幾日耳。且泣且拜。  
緹騎咸爲揮涕。下刑部獄。瀕死。賴惜公者。力爭  
僅免。謫睢陽衛。年三十四。憤恚矢志死。自預爲  
誌銘。以退之銘人者。如銘已。卽取以自銘。世共  
達之。公著詩一卷。文二卷。詩清婉有致。文則力  
追昌黎柳州。使假之年。進未可量也。予憐其志。  
爲敘而梓於秣陵。

倪文正題元祐黨碑云。此碑自崇寧五年毀碎。



遂稀傳本今獲見之猶欽寶籙矣當毀碑時蔡  
京厲聲曰碑可毀名不可藏也嗟乎烏知後人  
之欲不毀之更甚於京乎諸賢自涑水眉山數  
十公外凡二百餘人史無傳者不賴此碑何由  
知其姓名哉故知擇福之道莫大乎與君子同  
禍小人之謀無往不福君子也余凡兩見此碑  
各不同碎碑之後宜無可揭必當時令郡邑各  
建之或尚有存者故其式弗一耳

陳叔峰玉璫曰偉哉先生之言然先生不更  
加詳審槩以爲黨人也而賢之璫則不能無

言景  
辨嘗致黨人之內如呂公著韓維初爲安石  
延譽者也曾布章惇阿權廕仕李清臣首倡  
紹述之說以開國譽黃履訐垂簾之事擊呂  
大防劉摯而去之安燾依違蔡確章惇無所  
匡正葉祖洽對策言祖宗多因循苟且之政  
陛下革而新之遂擢第一若此者皆得與乎  
黨人之數是果皆得爲黨人乎哉先生以尊  
崇之過未加詳審由此而觀果賢耶否耶此  
鑒之所以不能已于辨也若夫程頤蘇軾劉  
摯梁燾諸君子固傑然稱賢矣然苟當日協  
恭和衷共圖國事則朝廷上下之間必有赫  
然大振者奈何互相犄角爲洛爲蜀爲朔各  
以類分致令蔡京得藉爲口實寃乃與章惇  
輩並列而爲黨不尤大可惜哉

袁石公典試秦中後頗自悔其少作詩文皆粹  
然一出於正死時年僅四十有四防風茅止生



爲刻其遺稿於秣陵此稿實勝於公舊刻止生  
一序亦極確當略無諱於石公予舊藏一冊沒  
于大梁今再覓之既不可得而止生原序石民  
集中又不載不知何故近見石公全集間有收  
入者然終不能備亦不如單行之爲愈

葉文通名畫無錫人多讀書有才情畱心二氏  
學故爲詭異之行迹其生平多似何心隱或自  
稱錦翁或自稱葉五葉或稱葉不夜最後名梁  
無知謂梁谿無人知之也當溫陵焚藏書盛行

時坊間種種、借溫陵之名以行者、如四書第一  
評、第二評、水滸傳、琵琶拜月諸評、皆出文通手、  
文通自有中庸頌、法海雪、悅容編諸集、今所傳  
者獨悅容編耳、文通甲子乙丑間、游吾梁、與雍  
丘侯五汝戡、倡爲海金社、合八郡知名之士、人  
鑄一集以行、中州文社之盛、自海金社始、後誤  
納一麗質、爲其夫毆死、文通氣息僅屬、猶鳴冤  
邑令前、惜乎無有白其事者、侯汝戡言其遺骸、  
至今旅泊雍丘郭外、



故老傳聞羅氏爲水滸傳一百回各以妖異引其首嘉靖時郭武定重刻其書削其致語獨存本傳金壇王氏小品中亦云此書每回前有楔子今俱不傳予見建陽書坊中所刻諸書節縮紙板求其易售諸書多被刊落此書亦建陽書坊翻刻時刪落者六十年前白下吳門虎林三地書未盛行世所傳者獨建陽本耳卽今童子所習經書亦尚是彼地本子其中錯訛頗多近已亥闡中麟經題訛至形之白簡宋時場

屋中亦因題目字訛致士子喧爭皆爲建陽書本所誤古今事相同如此故予謂建陽諸書盡

可焚也

又湧幢小品載姚祐者元符初爲杭州教授堂試諸生出易題乾爲金坤亦爲

金蓋福建本書籍刊板舛錯坤爲釜脫二點故姚誤讀作金諸生疑之因上請姚復爲臆說諸生以誠告姚取官本視之果釜也遂升堂自罰一直其不護短如此閩中書皆出建陽書坊街顧春吳岸生娶俞氏嘗涉獵書史有婦道春患瘵不起呼婦囑以好事舅姑養子女言旣切又至再三婦曰一言當終身服行何俟再三乃潛握剪以利鋒剗於左目流血滿地絕而復甦夫



責曰何乃如此曰示君信也夫乃絕沈石田有詩紀之

佛經有眼以睡爲食語何元朗見蘇端明手書赤壁賦而吾與子之所共適適作食後人以爲出此不知然否

吳梅村曰大司馬白谷孫公代州人長身伉爽材武絕人其用秦兵也將憑巖關爲持久檄趣之戰不得已始出天淫雨糧糗不繼師大潰潼關陷獨身橫刀衝賊陣以歿從騎俱散不能得

其屍公之出也。自念必死。顧語張夫人。夫人曰。丈夫報國耳。母憂我。西安破。率二女六妾。沉於井。揮其八歲兒以去。兒踰垣避賊。墜民舍中。有老翁者。善衣食之。二年。公長子世瑞重趼入秦。得夫人尸。貌如生。老翁歸以弟相扶還。見者泣下。蓋公素有德秦人云。公死而天下事遂去。然其敗由趨戰。且大雨糧絕。此固天意。未可專責公也。公之參佐。惟監軍道喬公。以明經奏用。能不負公。潼關之破。同日死。名元柱。定襄人。



張棊居曰。明詩四變。爲海內口實者七人。秦齊吳豫各一。楚獨居三。然初變而李何。再變而王李。不失爲盛也。變而公安竟陵。晚矣。吾豫當初變時。一人起而左右北地。鏗金戛玉。至今踔厲詞壇。王李樹幟。公安矯枉。豫獨不與。不欲與也。竟陵時。新野馬仲良。同伯敬起家。庚戌進士。自造新聲。偕吳門亦房唱和。其詩挾鏤性靈。鮮警秀異。足以移易一世。王馬之名。宜與鍾譚並。乃世唯口鍾譚。不及二氏。則爲仲良者。不幸而詩

不播於天下爲風氣所歸抑幸而不列變中反得免世詆訶耶

去汀州八十里名藍田石城邑所屬地有山號蠟燭峯圖秀異常山腰環轉一路如帶路產糯米雜砂礫中色若火微煨而文理劃然鄉人病心者拾嗽之卽愈余曾遊此命小溪數人拾各盈掬幾殆盡矣旋踵視之又纍纍如貫珠真異事也

蘇桓曰顧東橋先生初守開封抗中常侍遂遭



讒誣逮至京師、以公在官清惠、獄久不成、世宗  
皇帝密遣使就開封覈實、止得多裝詩卷一事、  
公對簿、謂時平流寇、實與巡撫都御史澤等賦  
凱歌、有所裝潢、如不法、則都御史亦不法也、中  
常侍讒遂不行、止鑄二秩、出知全州、時橫涇先  
生初成進士、公自全州貽書述祖宗之德、著謙  
慎之訓、凡千餘言、復寫在全所著定志篇、又詩  
十餘章、行楷莊健、頗得二王之法、桓今年自新  
建來、從橫涇先生曾孫夢游許、得見此書、慨然。

見先朝之法中常侍欲誣一郡太守而不可得  
又見世宗皇帝能爲一太守受誣遣使覈實且  
嘉其時爲方伯廉憲御史都御史無一人欺心  
媚內以傳會其事卒陷公者又見公爲太守時  
得與都御史賦詩爲樂不似今日上下懸絕分  
若君臣而公知弟之明教家之道俱可無愧於  
古人焉公仕至大司寇橫涇先生官僅憲副  
聞故老言南京舊院有色藝俱優者或二十三  
十姓結爲手帕姊妹每上元節以春擎具穀核



相賽名盒子會。凡得奇品爲勝。輸者罰酒酌。陪者中有所私。亦來挾金助會。厭厭夜飲。彌月而止。沈石田有盒子會詞。予二十年前。常見金陵爲勝會者。略有此風。今舊院鞠爲茂草。風流雲散。菁華歇絕。稍負色藝者。皆爲武人挾之去。此會不可復覩矣。

虎林昭慶寺僧舍中。有高則誠爲中郎傳奇時几案。當按拍處。痕深寸許。則誠名明。永嘉平陽人。旅寓虎林之崇儒里。博學洽聞。仕元。終福建

行省都事弟誠字則明亦有文名相傳高皇帝  
召明明以疾辭使者以明所爲中郎傳奇進上  
覽之曰五經四書譬諸五穀不可無此記乃珍  
羞之屬俎豆之間亦不可少余謂此亦後人傳  
會之語則誠之詞誠工使者恐終未敢以此等  
書上進也予又見續文獻通考以琵琶記水滸  
傳列之經籍誌中雖裨官小說古人不廢然羅  
列不倫何以垂遠

倪文正言梁鳴泉公五歲在父抱中輒請得卽



日就師學。父詒之云。今破日不佳耳。公曰。以  
吾愚。豈不佳。父大驚異。每語人。吾斯知項橐黃  
童。非俊物也。

吾邑王公半菴。名惟儉。字損仲。官至工部侍郎。  
性敏慧。嗜學。好收藏。三代銅玉器。常得漢玉觥。  
爲世所未有。因以寶觥名齋。日嘯咏其中。公每  
謂諸史中。無如宋史煩猥。欲刪潤之。以成一代  
之書。書成將半。而公謝世。汴水奔騰。並其未成  
之本胥失之矣。予生也晚。未及見公。僅得交令

嗣雁澤，後在吳門市上，得公詩文各一卷，予爲序而鐫之，以歸雁澤。公詩文皆不苟作，矜慎自娛，故所存不多，然亦無不足傳者。公起家山左濰邑令，予初謁選之前一日，夢公揭簾顧我，自言我同邑王半菴也。次日余適得濰令，公治濰多威惠，其去也，濰人德之，立祠祀公。予至邑之明日，卽往祀公，蓋公蒞濰時，甫廿餘，邑中至今呼爲小王公云。雁澤名溫叟，邑庠生，有品行。

商丘陳叟，名百萬，生長嘉隆間，一百九齡，曾登



賓筵無子有二女子友雲間周宿來茂源過廣  
丘作一百九齡陳叟歌贈之

楚有張君燧爲陳士業言廣南有韋土官自言  
淮陰後當鐘室難作淮陰客某匿其三歲兒知  
蕭相國素與侯厚善客往見之微示侯無後意  
相國仰天嘆曰嗟乎冤哉淚淫淫下客見其誠  
以情告相國驚曰若能匿淮陰兒乎中國不可  
居矣急跳南粵趙陀遂作書遣客匿兒於陀曰  
此淮陰兒公善視之陀養以爲己子而封之海

濱。賜。姓。韋。用。韓。之。半。也。今。其。族。世。豪。於。海。壖。間。  
有。鄮。侯。所。遺。之。書。尉。陀。所。賜。之。詔。勒。之。鼎。器。士  
業。曰。予。常。怪。趙。陀。以。魑。結。箕。踞。之。君。長。而。薄。粵  
中。無。足。與。語。遇。陸。生。廼。蹶。然。而。起。今。以。韋。君。之  
事。觀。之。陀。固。人。傑。也。哉。獨。惜。淮。陰。之。客。存。藐。孤  
而。卒。不。顯。其。姓。名。於。天。壤。也。悲。夫。

或有難士業者曰。子記韋土官事奇矣。奈與史  
抵牾何。長樂鐘室之禍。蕭相國實給之。司馬遷  
云。呂后用蕭何計誅淮陰。蓋實錄也。何忍於其



身而廼稱冤於其客不亦謬乎曰唯唯否否何  
之給淮陰也悉出呂后之謀何亦懼禍而迫于  
不得已耳呂后謀之而何不從高帝之疑當不  
在於請苑益田之日矣且召平不云乎上暴露  
於外而君居守於中非被矢石之事而益封置  
衛徒以淮陰新反疑君心也夫益封置衛不以  
爲報功而以爲見疑平亦知誅淮陰之事於相  
國無與矣自古功臣冤歿者衆而淮陰爲最悔  
不用蒯通之計之一言淮陰心事昭然司馬遷

以反之一字加之。非爲呂后諱。爲高帝諱也。

德州程正夫言。順治癸巳正月十八日夜。風厲甚。恩縣祁村陂中。冰卓立成山。廣四丈。高二丈許。峯巒秀拔。谿壑廻環。一磴委蛇相通。觀者遠近褰糧。至日千餘人禱祠焉。遍考諸書。古無此異。不知何祥也。余按正德中。文安縣水忽僵立。是日天大寒。忽凍爲冰柱。高五丈。圍亦如之。中空而旁有穴。數日後。流賊過文安。民避入冰穴。賴以全活者甚衆。正如此類。



胡菊潭先生曰。蜀中新灘。巨石亘流。空舫越渡。昔有行僧。發弘願。欲槽石梁。以通利涉。江神夜告之曰。此天所以養斯地。窮黎也。如公約。民不聊生矣。遂已之。蓋放舟剝運。皆貸力於土人。朱竹。墨菊。余初亦但求之楮穎間。後親見朱竹於延平山中。數頃琅玕。丹如火齊。又類典中載漢時永壽里出墨菊。其色如墨。古用其汁爲書。乃知世原有此。特未之見耳。各賦二詩紀之。高情直與晚楓隣。傴舞安知醉有辰。舊族傳爲絳

縣老孫枝近作赤城人，瀟湘淚盡終餘血。淇澳  
花繁不是春，曾在龍門柯畔立。支離更見爨中  
身，一亂擗桃花映客醺。斜批鶴頂間青蘿，翻新  
競比紅兒曲。截笛畱吹赤帝歌，酒醞宜城光未  
定。冠裁薛縣色全訛，遙看岩下爛編處。或是秋  
深相葉多，右朱竹寂影模糊陶令門。元霜冉冉借  
秋痕，雨中送酒衣偏白。霧裏看花眼倍昏，永壽  
寒尋蒼玉亂。南陽晚映碧潭渾，就荒三徑歸來  
後，只覺長松獨自存。一把得寒英色未倫，夕餐



只認鞠通身，籬邊月落情無奈。霜裏燈搖影倍  
新，不識黃金真燦艷。獨憐青女自橫陳，瀟瀟  
夜重陽雨。元對羲皇以上人。  
右墨菊

某吏部一夕爲小偷入宅，宅內戶扇嚴甚，無所  
得。獨盜鷄雙翼以去。吏部故居城郭，次早則縣  
典史至，次知縣至，次知府至，問所失幾何，願授  
簿追之。吏部僞以金銀錦幣諸重器爲籍，使追  
捕如法。數月後，獲他盜於境，盜多重寶，郡縣皆  
知其非吏部物也。然陰迎合之，召其家使識，具

識爲已物，沒入之。又有吏部某，忘其名。吏部始居城郭，以擇形勝山居。所居曠漠，一日午坐，盜僞爲某官來謁。吏部方出肅客，盜卽持其手，紅巾露刃，左右班聲如雷，盡空其所積以去。次日郡縣守廵各至，問所失。吏部曰：「吾家無一物，獨去破氊具一床耳。然郡縣守廵畏其威，不敢不捕緝如法，旬月獲之。諸重噐具在，盜亦自伏爲吏部物，召使識之。吏部竟以前辭拒不受。」艾子曰：「夫識其所有，與識非其所有，人性之常也。」



兩吏部一以名一以利至於冒其所非有而不  
敢居其所有哀哉

續文獻通考載羅貫中爲水滸傳三世子弟皆  
啞此書未大傷元氣尚受報如此今之爲種種  
宣淫導慾之書者更當何如可畏哉

水滸傳相傳爲洪武初越人羅貫中作又傳爲  
元人施耐庵作田叔禾西湖遊覽誌又云此書  
出宋人筆近金聖歎自七十回之後斷爲羅所  
續因極口詆羅復僞爲施序於前此書遂爲施

書影  
有矣。予謂世安有爲此等書人。當時敢露其姓名者。闕疑可也。定爲耐菴作。不知何據。

古文人初持其一偏之說。與人鑿鑿不相下。殆識益高。心益下。未有不翻然自悔者。王司寇元美。其始與歸震川太僕。論文頗有異同。及歸自留都。從其家求圖像。屬婁子柔書之。曰。千載惟公。繼韓歐陽。余豈異趣。久而始傷。又公素不喜蘇氏文。而公之季子。時向子柔言。公之歸也。嘗讀蘇應詔諸篇。顧語之曰。此乃可爲策耳。吾晉



楚錄文豈能及之哉。又傳公易簣時，床頭尚有文忠集一帙。又公常書陳白沙集後云：公甫詩不入法，文不入體，又皆不入題，而其妙處有超於法與體題之外者。余少學古，殊不相契。晚節始自悔心，偶然讀之，或倦而躍然以醒，不飲而陶然以醉，不自知其所以也。公又常題西涯樂府後云：余向者於李賓之先生擬古樂府，病其太涉議論，過爾剪抑，以爲十不得一。自今觀之，奇旨創造，名語疊出，縱未可被之管絃，自是天

地間一種文字。若使但求諸於房中。饒吹之調。取其字句。斷爛者而模範之。以爲樂府如是。豈非西子之顰。邯鄲之步哉。余作藝苑卮言時。年未四十。方與于麟輩。是古非今。此長彼短。未爲定論。至於戲學世說。比擬形似。旣不切當。又傷猥薄。行世已久。不能復秘。姑隨事改正。勿令多誤。後人而已。錢牧齋宗伯曰。嘉隆之際。躋北地而擠長沙者。元美爲之職志。至謂長沙之啓。何李猶陳涉之啓。漢高及其晚年。氣漸平。志漸實。



舊學銷亡。霜降水落。自悔其少壯之誤。而悔其  
不能改作也。於論西涯樂府三致意焉。今之談  
藝者。尊奉弇州卮言。以爲金科玉條。引繩批根。  
恐失尺寸。豈知元美固晚而自悔。以其言爲土  
重墜餘。平津刻舟之人。知劒去已久。未有不爽  
然自失者也。合觀元美先生所言。與牧齋先生  
所論。後之人見地未明。擇途未定者。其持議何  
可不慎哉。

空峒黃河水。遶漢宮牆之什。集中不載。或以爲

結有只今誰是郭汾陽句。唐人事空同。自以爲不讀唐以後書。恐開後人口實。故自逸之耳。先輩矜名太過。論多拘泥如此。然今日隨手掇拾。無事不可入詩者。觀此亦當少知所戒矣。

李子田曰。金山志。唐孫魴詩。萬古波心寺。金山名日新。天多剩得月。地少不生塵。櫓過妨僧定。濤驚濺佛身。誰言張處士。題後更無人。而李翱詩云。山載江心寺。魚龍是四隣。樓臺懸倒影。鐘磬隔羣塵。過櫓妨僧夢。驚湍濺佛身。誰言題詠



處流響更無人夫。翺唐之名士。不應登一名山。至蹈襲同時之人如此。或編書者誤耶。○李習之不能詩。集中僅二首。亦不佳。未嘗有此篇也。决係編書者誤收。

水土之氣。上升爲天。地有體。而天無體。譬如火焉。烟在上。灰在下也。夫天。元氣也。皓然而已。無他物焉。見楊泉物理論。此語最確。然水土之氣。上升爲天。尚覺有滯。滯在爲之一字。當云水土之氣。上升於天。方合皓然無體之理。

常山梁慎可維樞曰薛公家相以尚氣忤中貴  
殞其身公沒藉其家無數百金產天下莫不悲  
之公嘗言天下無事所重只一豕宰有事只一  
大司馬明朝兼長者前馬鈞陽後惟楊蒲州

李國祥字休徵江西南昌人張林宗先生之師  
也幼而穎異博學能文由例監仕充以詩罷官  
貧不能歸僑居夏鎮日不能給購其文者或予  
數金得卽散之所著有濡削選章河工諸議松  
門山房十部集行於世



一甲科問於蓮池曰。世間何等人最作孽。蓮池曰。公等甲科七篇頭。老先生爲最。其人愕然曰。自揣生平。未必至此。蓮池喝曰。誰說你自做來。諸凡倚勢作威者。上帝降鑒。悉坐。公等於是縉紳之徒。咨嗟太息。不得其方。明卿獨曰。方寸不惡。五官誰敢所患。已實惡。而藉口親戚。反開脫罪之門。上帝深怒耳。苟朝夕計過孽。孽積德。彼倚勢作威者。明神有赫。獨能逃乎。

張萊居曰。燕市有龍身。方鱗鉤爪。長六尺許。頭

角悉具，係宮中貢物，按方鱗古未經見，誌之備博物一班。

予幼從家大人手錄詩藁中，見牛左史周藩王宮辭五首，詩雖不多，然可代夢華錄數卷，因爲梓傳，當時但知左史爲武功人，而不識其名，後致牧齋先生，載入列朝詩選中，先生云：左史名恒，嘉靖乙未進士，有才名，常爲劉繪所推云。左史原詩錄後，春殿牙籤萬軸餘，香勻風細綠窗虛，侍兒臨罷誠齋帖，函出先呈女較書，一蕭蕭



修竹映池寒，分汲銀瓶灌牡丹。報道花朝開內  
宴，競持金剪遶朱欄。二夜來行樂鴈池頭，侍女  
分行秉燭遊。唱徹憲王新樂府，不知明月下樊  
樓。三叢生桂樹後山幽，花石猶傳後代留。宮媼  
引來巖際望，蔡河春浪拍天浮。四吹臺南下令  
婆墳，憶昔從王掌祕文。今日綺羅何處是，野花  
啼鳥自紛紛。五

寫小照者，推閩人曾波臣。鯨波臣以秣陵爲家，  
然余未及見其人。近則推莆田郭無疆、鞏虎林

謝文侯、彬兩生筆致秀婉，無作家氣，不獨曲肖神情已也。記金陵人言戴文進永樂間初至金陵，襆被爲負者挈去。文進借酒家筆，圖其貌示衆。役夫咸曰：「某也。」往迹之，得不失。吳小仙春日同入遊杏花村，酒渴，從老嫗索茗。明年復過之，老嫗已謝世。小仙援筆追寫其像，其子見之，大慟不已，乞而藏之家。又傳小仙幼時戲爲蒙師之婦寫照，師怒詈之。後婦亡，累摹弗肖，竟用小仙之筆以祀。近吾友陳章侯偶做淵明圖，爲子



寫照見者以爲郭謝兩生不能及三公皆不以  
寫照名而落筆輒奇妙若此至人信不可測  
永州知州某有母年八十餘度不得見其子而  
死剪髮一縷寄之而某居州如故唐公有懷時  
爲守聞而惡之力請黜免上官曰是素無大過  
公曰一縷髮足矣過有大於是者乎卒黜之有  
懷爲荆川公尊人

楊升菴常詆解春雨學士書爲鎮宅之符近日  
圖家競目吳小仙張平山爲外道蕭伯玉常言

其家正固先生傳是春雨楷書精妙絕倫與其  
先長史公書雖復奇逸亦不失程度而余在南  
都從顧東橋先生從孫友生家見小仙爲東橋  
先生所作山水細潤絕倫家大人所藏平山韓  
熙載夜燕圖通幅皆有夜氣細秀無點塵俗皆  
不類尋常所見乃知世人妄詆前人書畫皆未  
見真本耳持論不可不慎。

小品中載有薦藝士於顯貴者其人固平易顯  
貴雖禮之然未嘗問其所長瀕行其人曰辱公



愛有小技願獻於公乃索素紙爲圍碁盤信手  
界畫無毫髮謬顯貴驚嘆○正統間周伯器年  
九十修杭州志燈下書蠅頭字界畫烏闌不折  
紙爲範毫髮不爽○章友直伯益以篆名官翰  
林待詔同人聞其名心未之服咸求願見筆法  
伯益命粘紙各數張作二圖其一紙縱橫各作  
十九畫成一碁局其一作十圓圈成一射帖其  
筆之麤細間架疎密無毫髮之失諸人嘆服再  
拜而去○古今絕技亦有相同者如此

荆南居客麻城忠淳間有一鸚鵡見長老壽普  
來忽鳴曰望慈悲長老曰小畜誰教爾能言鸚  
鵡自後不復聲麻縱之徑赴僧側啾啁致謝僧  
曰宜高飛免再墮又求指示僧令誦佛經八年  
僧至桃源一小兒來謝曰吾麻氏鸚鵡也荷方  
便今在蕭家作男子矣驗之脇下尚有翅毛○  
有宦閩者攜雙鸚鵡歸江右兩禽晨夕相依如  
昆季宦者以一贈陳子右薊韓子人穀亦得其  
一陳韓固親串過從無間鸚鵡時互相問哥哥



好。未幾陳子齋中有異物搏鸚鵡死。陳子痛之甚。旣除地以瘞之。又語人穀賦詩吊之。詩成人穀持告其家羽。輒騰躑架上曰。哥哥。死。哥哥。死。傷惋不勝。遂不食。越日亦蛻去。二子廣乞名詞爲之志述。江右三吳諸詞人皆有作。因彙爲一集。顏曰羽聲合刻。鄧子左之爲之序。序亦悽惻。肆動物固多情如此。又吾梁山貨店市肆養鸚鵡甚慧。東關口市肆有料哥。亦能言。兩店攜二鳥相較。鸚鵡歌一詩。料哥隨和。音清越。不相下。

料哥再挑與言不荅一字。人問其故曰：彼音劣。我而黠勝我開口，便爲所竊矣。臬司有愛子，病篤，購以娛之。賈人籠之以獻。鸚鵡悲愁不食，自歌曰：我本山貨店中鳥，不識臺司衙內尊。最是傷心懷舊主，難將巧語博新恩。留之五日，苦口求歸，乃返之山貨店。垂頸氣盡，萬曆年間事也。余同書中記古鸚鵡夢二則，已爲奇絕。鸚鵡能詩，尤所未聞。詩選入列朝詩集中，尤奇。然每以語人，人多不信。後閱逸史，唐武后蓄一鸚鵡，名



雪衣能通心經。后貯以金絲籠。一日戲曰。能作偈求解脫。當放出籠。雪衣若喜躍狀。須臾朗吟曰。憔悴秋翎似禿衿。別來隴樹歲時深。開籠若放雪衣鳥。常念南無觀世音。后喜。卽爲啓籠。居數日。立化於玉毬紐上。后悲慟。以紫檀作棺。塋於後苑。鸚鵡作偈。頓證正果。尤異矣。

元人作劇。專尚規格。長短既有定數。牌名亦有次第。今人任意增加。前後互換。多則連篇。少惟數闕。古法蕩然矣。惟予門人邗江王漢恭名光。

魯所作想當然猶有元人體裁其曲分視之則  
小令合視之則大套插入賓白則成劇離賓白  
亦成雅曲不似今人全賴賓白爲敷演也又常  
見構李李君實所爲禮白岳記分視之各爲一  
則合視之共爲一記而詩卽連綴於中分視之  
則詩合視之詩亦記也詩文照映使山水神情  
無所遁避其間真是合作今人爲遊記者意在  
謀篇終難逐境章法固自貫串境地終未分明  
且記自記詩自詩使讀者因記以憶詩持詩以



尋記筆墨間隔神情不屬不數行欠伸欲臥矣。故予以爲王生之劇。李公之記皆可爲今人法也。想當然托盧次楨之名以行實出漢恭手。相傳黃山畢公服溫胸臍初頗有驗久之得沙淋疾沙皆作犬形頭尾略具又傳潤州某公補劑中多用敗龜板垂十年頗健晚患蠱脹乃謁白飛霞飛霞診視良久曰此瘕也公豈餌龜板藥耶今滿腹皆龜。吾藥能逐之其骨節腠理者非吾藥所能也乃與赤丸數粒服之下龜如菽

大者升餘、得稍寬、不數月、歿、易簀時、驗小遺、悉有細蟲、髣髴龜形、物得氣而傳如此、可畏哉、

閩中才雋輩出、穎異之士頗多、能詩者十得六七、壺蘭以下、間有拘字、會城以上、則居然正音、彬彬風雅、亦云盛矣、第晉安一派、流傳未已、守林儀部高典籍之論、若金科玉條、凜不敢犯、動爲七律、如出一手、近頗有尤異之士、逸出其間者、然終不勝慎守故調者之多、八閩士人、咸

能作小楷、而會城人尤工、此兩浙三吳所未有、



勿論江以北也。第舍古法不遵而專學林處士  
寵處士正書倣歐率更而間以黃庭之意行之  
處士意在以勁婉驛騎兩家而學者專尚其斌  
媚千腕一律數見不鮮並處士亦爲人口實矣  
凡此皆予閩中憾事至於蘭過嶺始芬書十年  
卽腐此則天制之非人力所能爲也

元武伯英咏燭剪一聯云啼殘瘦玉蘭心吐蹴  
落春紅燕尾香後人艷稱之李君實以爲上句  
無味改爲吐殘月魄墓顚動蹴落花鬚燕尾香

後又改云、朱櫻顆、圻金蟲墮、絳樹花、綫玉燕斜。  
自云、綳麗、予謂、墓、願二字、不雅、玉燕斜、終不如、  
燕尾之恰、武之上句、咏燭、下句、咏剪、不必字字、  
燭剪始爲工也。

李君賓常言、精墨乃松液所成、又經化煉、輕升、  
滓濁盡去、如膏如露、濡毫之餘、閒用吮吸、靈奇、  
之氣、透入竅穴、久久自然變易骨節、澄鍊神明、  
謂之墨仙、非虛語也、世謂耽書畫者必壽、此理、  
也耶、予戲謂、鞠通嗜墨屑、遂能妙合琴理、愈人、



聾聵此必服食之一種。滕達道、蘇浩然、呂行甫、皆好啜墨水，不徒作韻，正欲得仙。北齊策秀才下者，飲墨水一升，非徒罰其濫劣，正欲藉此妙藥，豁其靈心耳。

李贄皇與白傳不協，終身不肯見其詞翰，恐一見便爲回心。宋延清乞其甥劉希彝花落花開之句，許而不與，怒以土囊壓殺之。今人讀詩文者，痛癢了無覺觸，求其能以土囊壓人，乞取佳句者，正不易得。况啓篋回心者乎？

蕭伯玉云、馬季房詩、黃茆、白霧、三千、嶂、瘦馬、單、  
衫、十、八、盤、秣陵舊院、繡幕、鶯花、三、月、雨、回、梁、燕、  
語、六、朝、春、故、自、佳、

陳士業曰、唐人之文、散亡而不傳者甚多、其不  
足傳者無論、乃若卓然見於韓柳文集、如退之  
所稱之侯喜、子厚所稱之吳武陵、一以爲其文  
甚古、一以爲可追西漢、兩君著作、必有大過於  
人者、今其集俱無存矣、歐陽公藝文志、載有吳  
武陵詩一卷、而他氏之目、則俱無之、若侯喜所



作則雖歐志亦已不覩其名。獨其載於英華文粹者。僅僅未絕耳。二人見推於韓柳之文。彰明較著如是。而其集俱不免于散亡。其他泯沒者。又何可勝道。宋之古文。始于穆伯長。伯長矯楊劉駢麗之習。力以韓柳爲宗。其後遂有蘇子美輩典雅之文出焉。而尹師魯歐陽永叔。翕然一變於古。則皆伯長所開也。然伯長不特長於古文。先天之圖。秦漢以來未發之祕也。而康節得自伯長。太極之圖。周孔未盡之蘊也。而茂叔亦

得自伯長。是宋之文統與道統皆自伯長倡之。伯長之文必非無關係之作。今其集亦竟未見于世。馬端臨通考有穆修集三卷。而近日焦弱侯太史亦列其目於經籍志。與端臨卷數正合。則其集固未常亡。特未見有好事者爲之流布耳。嗟乎。古文之存於今日鮮矣。藏書之家祕之。而不以示人。剞劂之家求之而不可遽得。兩者不相爲謀。則是古文終無流布之日。可嘆也。

徐世溥曰。詩文之傳。有幸有不幸焉。幸而出於



童子則傳者什九。幸而出於婦人。女子則一脫口箴。不傳矣。今婦人之能詩。蓋鮮矣。以其爲婦人也。故人不求備。不大望焉。於是或並其陋者載之。古者太史採詩。以觀民風。自羈旅窮士。匹婦兒童之歌謠。莫不採之。以今揆之。必其出於男子者。十八九。而婦人之詩。一二也。孔子刪詩。定國風。婦人之詩。乃十居六七。豈當世婦人多能詩。而男子不嫺歟。抑豈以女子故重之。以男子而略之歟。後世太史採詩之職廢。而民間女

未聞有詩者自非托於貴族書於驛拾於道失  
身於倡家而贈送遠人微是四者雖有谷風之  
怨死麀之貞無由得傳故後世有貴姬與賤倡  
之詩而無士庶妻妾之詩斯所由古者多而今  
也少乎

宛丘王氏十五歸予卽能詩如溪上云小雨勻  
溪穀間花落釣絲題顧綉大士像云月融全昧  
指煙動強名絲咏侍兒纖指云剔花春影膩浣  
硯墨痕纖夜坐云秋心增半夜雨氣滿孤燈小



女牽衣問大母平安云牽衣憐弱女學語問高  
堂貝葉菴春日云承花間布席拜月自開簾聞  
警云薄命憐蟲臂全家在虎牙避暑柳下云半  
楊閒院高樹葉一林獨聽晚蟬聲圍城云已分  
殘軀同鼠雀敢言大樹撼蜉蚶哭父云脉望生  
前寧作蠹蒼松化後不爲樗戲題三姊畫彌勒  
像云強顏一笑全無着覲面時逢號未來七夕  
云一夕綿綿億萬年猶勝人間白頭死皆有思  
致詩二百餘首小詞數十首余欲傳之輒欲自

焚曰、吾懼他日列狡獪瞿曇後、穢跡女士中也、  
蓋自來刻詩者、方外之後、緊接名媛、而貞婦烈  
女、大家世族之詩、類與青樓泥淖竝列、姬每言  
之、輒以爲恨、予嘉其志、書而藏之、不敢付梓、並  
其名字亦不忍露也、

楊穀茂才、上元尹以苦役役其父兄、穀往訴之、  
尹以其高年、易之試、以詩、穀援筆成草、中射虎  
心、空在天上、屠龍事已、非之句、尹改容謝之、  
吳擴、字子充、崑山人、移家秦淮、崔駙馬山池一



詩云平陽池館接青霄。閨苑瀛洲路不遙。帝女  
巧。將霞製錦。仙人常以鵲爲橋。樓前疊石雲生  
座。洞裏探梅雪滿條。詞客慣來陪賞洽。月明酣  
聽鳳皇簫。李于麟選入詩刪。子充卽元日賦詩  
懷介溪閣老者。

盛仲交游祈澤寺。從佛龕中得弊紙書一律云。  
研池滿座落花香。墨透纖毫染漢章。靜卧衲衣  
雲似水。高懸紙帳月如霜。栢浮野渡魚龍遠。錫  
振空山虎豹藏。幸對爐烟坐終日。煮茶清話得

書影  
徜徉友人褚頌呈雪庭法師座前清覽洪武辛亥暮春書清隱小軒周吉父云頌字本中不知是金陵何許人也

馬融圍碁賦橫行陣亂敵心駭遑迫兼其雅頗棄其裝按雅音義與岳同碁心及四角各據中一子謂之五岳言不可移動也卽今所謂勢子但今黑白子各二分據四隅耳中一子應黑應白必又有法古今道數亦自不同近余集生中丞創爲圓碁盤然其法與方碁盤亦無大異



圓觀李源歌三生石上竹枝詞者甘澤謠神傳皆作圓觀蘇長公作圓澤

今人演武三思素娥雜劇鄙俚荒唐見之令人噴飯然實本於唐祠部郎中袁郊所作甘澤謠或曰甘澤謠別自有書今楊夢羽所傳皆從他書鈔撮而成僞本也或曰夢羽本未出時已有抄太平廣記中二十餘條爲甘澤謠以行者則夢羽本又贗書中之重儔矣

江淮謂群鸛旋飛爲鸛井見酉陽雜俎近聞人

口、鵲巢中銜土爲窠、含水貯之以飲雛、名鵲井、  
甘蔗聞雷而長。孔雀聞雷而孕、

黿腸屬於頭、故倒懸之、則頭垂於地、

食葉者有絲、食土者不息、食而不飲者蠶、飲而  
不食者蟬、不飲不食者蜉蝣、○孔雀尾端一寸

名珠毛。○鶴左右脚裏第一指曰兵爪。俱見酉  
陽雜俎、

左傳莊公寤生、驚姜氏、杜預注、寤生、難產也、不  
言其詳、宋朱申注、武姜寐時生莊公、至寤方知



之以其寤寐而生故武姜驚也焦弱侯筆乘載  
吳元滿說據文理寤當作迢音同而字訛迢者  
逆也凡婦人產子首先出者爲順足先出者爲  
逆莊公蓋逆生所以驚姜氏予以臆論之今北  
方難產者落地無聲若熟寐然以火氣薰接其  
臍或從旁擊鏡以引其聲始能寤謂之草寐十  
只有一二生全頗使人驚寤字原不訛傳言莊  
公寤生不言武姜寤生也如魯齋注則當云武  
姜寤生矣魯齋注固可笑硬改迢字亦屬牽強。

書影 一  
不如杜注難產。所包者廣也。水經注曰：徐君宮人娠而生卵，以爲不祥，棄於水濱。孤獨母有犬，名曰鵠，倉得棄卵，銜以歸。獨母以爲異，覆煖之，遂成兒。生時偃，故以爲名。按偃卽寤，生意。

廣韻藻載鵠頭書，古用以招隱士。按蕭子良古今篆隸文體曰：鵠頭書與偃波書俱詔板所用。漢謂之尺一簡。後人因唐詩有鵠書，猶未至那出白雲來，遂謂古用以招隱士。若其餘詔板皆不用此體，又若獨創此體以招隱士者，泥矣。



盧與累任大郡或有無良惡跡之人必行嚴斷  
仍以所犯之罪刻石立本人門首再犯處於極  
刑民間畏懼絕無犯法者故民間呼其石爲記  
惡碑右見天寶遺事○卽今州縣送惡人牌懸  
門之始。

金日磾母死詔圖画甘泉宮婦人圖形僅見此  
呼延贊有膽勇鷙悍輕率常言願死於敵徧文  
其體爲赤心殺賊至於妻孥僕使皆然諸子耳  
後別刺字曰出門忘家爲國臨陣忘死爲主盛

冬以水沃孩幼，奠其長能寒勁健，其子常病，贊  
割股爲羹療之。見宋史。割股療兒，真大罕事。  
身爲犧牲，禱於洪水，洪水無知，沒而後已。民思  
其仁，立廟以祀。嗚呼哀哉！不書於史，右五代晉  
趙元佐羊使君廟贊。○廟何地，羊何名，惜乎不  
傳。

俗尚九月九日，謂爲上九。茱萸至此日，氣烈熟  
色赤，可折其房以插頭。云辟惡氣禦冬。右見風  
土記。○上九字自無人用。



婆利國人善投輪其大如鏡中有竅外鋒如鋸遠以投人無不中右見南北史○此亦軍中捷利之器投法亦不難講

南北史耿詢作馬上刻漏古稱其妙○馬上刻漏大是軍中所需今失其傳矣

高彪校書東觀後遷內黃令帝勅同僚臨祖送於上東門詔東觀畫彪以勸學者右見東漢書○圖形東觀文士雲臺

唐劉元濟遷著作佐郎自魯哀公十三世接戰

國爲魯後春秋○春秋卽難嗣響此書正恨失傳哀後十三世採撫何由頓富

象周公樂也南人服象爲虐於彛成王命周公以兵追之至於海南乃爲三象樂右見文選西征賦注○周公南征見此

嘗於友人案頭見易解是近賢所著忘其名中有一說謂坎離由乾坤再索而得雖爲中男中女而實則嫡男嫡女也此義甚妙蓋畫卦者自下而上必以中爲尊位故雖震之長男巽之長



女不得與坎離爭重。卽以五行之理考之。五行雖均爲天地之用。而不若水火之尤全。所以震與皆處於木位。而坎離遂當以水火。彼先天乾南坤北之位。後天直以坎離居之。亦以坎離盡乾坤之用也。此與帝王傳位於嫡何異。或曰。伏羲畫卦之時。未必卽有嫡庶。嫡庶之分。亦未必如此嚴也。不知上世卽無嫡庶。而嫡庶之理自備。猶上世一切制作未具。而後世宮室杵臼。官名物數。一一見之。星象者。當輕清上浮之始。必

言景  
已先示之矣。

天地止有水火二物木則火之始金則水之始也而水火又止一物蓋一物之呼而必吸開而必闔也而其呼吸開闔之轉關處則土也大熱之後轉而大寒非得土以滋息不能爲此過接而土實非外借又卽大熱之盡頭不繼處自然有此休息耳今思人身惟心腎二物相爲消息而肝木則引腎以上滋心火如膏火之間有燈心傳送故曰肝者幹也猶本之有幹也肺金則



抑心火以下棲腎水故肺主斂氣氣者火之上  
昇也然自永而上達於木火其勢順而易自火  
而曲入於金水其勢逆而難逆而難者非更侍  
以士不爲功故肺金雖制心火亦必心思稍就  
間逸合土之靜重而後能斂其浮散之氣也

離爲火火陽精也宜卦屬陽而反中虛爲陰坎  
爲水水陰精也宜卦屬陰而反中滿爲陽以知  
坎離蓋陰陽交媾也今觀水氣清冷而滋木出  
火豈非坎中之陽火氣炎烈而伏金生水豈非

離中之陰然水竟能滋木而火必藉土伏金則又順逆之說也雖然土不獨功火而亦功水蓋土性中和火熱則滋其潤而伏金水寒則資其溫而滋木故土雖居中央而實旺四季卽木之舒而爲火金之斂而爲水何莫非滋於土也獨位於中央者從其至重者言之也若後天之易離火之後繼以坤土坎水之後亦繼以艮土又舉其并重於水火者言之也

既濟未濟以坎離合而成卦然坎上離下爲既



濟而中互未濟離上坎下爲未濟而中互既濟  
蓋火上水下不能有生物之功矣而中接以未  
則水將上行而火亦下降水上火下可以有成  
物之用矣而非中隔以金則火將上行而水亦  
下注是既濟之可不至於未濟而未濟之終可  
以爲既濟者金木之爲用亦不小也

揲著之法爲聖人神道設教而作而世人守之  
若真有鬼神屑屑焉告之以某卦某爻者聖人  
亦樂得其意用之實非如此也何也易之全理

一卦一爻當時聖人原就其時之消息位之當否而推其理之所必至遂有吉凶悔吝之占耳而況由一卦一爻而極其變又有不可窮盡者乎故人之應事任舉一卦一爻無不可懸斷其休咎決然不爽者如乾之初九象爲潛龍占爲勿用使欲爭訟時筮得此爻雖復情真理直或所處卑弱難以見伸亦且暫止無爲輕動也儻自反果無冤枉而勢又可前則龍旣非潛何爲勿用如此方爲善體潛龍勿用義以此推之卽



此一爻斷盡天下無窮事類君子居安樂玩正是此理但愚人難曉易生怠玩非藉神道不足以起其敬信故聖人設爲揲著之法若有鬼神告之者使人鼓舞不倦耳究竟揲著之時雖值某卦某爻亦必筮人爲庸衆解譬但得深明易理通其變例者而與之言則抱著問易之時固不異君子居安樂玩時也

儒者之論一切休咎徵應斷之以理而識緯術數之學不之取焉然世傳郭景純管公明諸人

應驗之法有非理可格者今時習見六壬諸書  
所載有一物名一瑣事無不可以術數推測而  
合亦仕往有驗者此何理也其數以任舉一物  
或卽其所值之時因以起例夫任舉一物一時  
而合必其再易一物一時而無不合者將天地  
之大運會之遠皆於偶然一問相爲觸發豈能  
盡諧若謂所值之一物一時必非偶然豈真有  
使之而然者而鬼神於其所問之事物一一預  
爲之安排造作使其定舉是物值是時又爲之



啓其靈心引發見地俾必出於此而後能驗焉  
不亦勞而難給乎此真有不可解者不得已以  
天機二字模糊過去天機是何等來歷也請與  
天下人細勘此天機焉

京氏易六十四卦次序今日占家所祖雖未必  
合平伏羲文王之指而亦自有其理蓋易以變  
爲用者也故首之以八卦其下第二卦第一爻  
變第三卦第二爻同變第四卦第三爻同變第  
五卦第四爻同變第六卦第五爻同變至於五

爻變而止矣不可以更進於是乎退而化焉化  
卽於五爻則復爲第五卦矣故隔一爻而後化  
以其隔一爻也而謂之遊竟第七卦承上卦而  
化其第四爻者也第八卦則舉下卦之全體合  
同而化以其下體之復於本卦也而謂之歸竟  
總而言之到底不變者上爻也一變而已者五  
爻也一變再化者下四爻是也蓋亦莫非天地  
自然之數也

易有七八九六而爻但繫九六者舉隅之義也



故發其例於乾坤二卦曰用九用六用其變也  
亦有用其不變者春秋傳穆姜遇艮之八是也  
今卽以艮言之二爻獨變則名之六條爻皆變  
而二爻獨不變則名之八是知乾坤亦有用七  
用八時也乾爻皆變而初獨不變曰初七潛龍  
勿用可也坤爻皆變而初獨不變曰初八履霜  
堅冰至可也古變者其當也古不變者其反也  
故聖人繫之九六如近日占冢之有重交單折  
不可以定名也舉重交以包單折此臨文之不

得不然讀者固不可以執一也○國語晉公子  
筮得貞屯悔豫皆八註震下坎土屯坤下震上  
豫得此兩卦震在屯爲貞在豫爲悔八謂震兩  
陰爻在貞在悔皆不動故曰皆八又董因對公  
曰臣筮之得泰之八註乾下坤上泰陰爻不動  
其數皆八

天陽積氣也包乎地外地陰積形也浮于天中  
故人身衛氣在皮榮氣在肉肺腎統氣居心脾  
用之外心脾肝統血居肺腎之中日之自晴居



外黑晴居中血陰而氣陽陽外而陰內也

人身全體象大極負陽抱陰象兩儀頭身足象  
三才心肝脾肺腎象五行肺心居上脾居中肝  
腎居下其序符乾一兌二離三震四巽五坎六  
艮七坤八之位次象八卦八卦土居後五藏土  
居中居中以統四猶居後以統前也居上爲陽  
分則尊尊者逸居下爲陰分則卑卑者勞居中  
則亦尊亦卑亦逸亦勞是以肺居上而不用心  
爲君主無時不用而實不自用脾司意想用司

謀慮腎司技巧三者則無時而不用有君臣之義焉心肺陽陽主施肝腎陰陰主受脾統陰統陽不施不受故肝受肺夫之氣以有膽膽代肺金以司斷是以決斷則用膽腎受心君之氣以有命門命門代心火以司動是以撮吸呼召則用命門有夫妻父子之情焉又肝爲陰之陽故肝膽分而其體猶合腎爲陰之陰故左水右火判而體爲二心肺脾則一而不分是又陰陽奇偶之別歟



鼻者肺竅也而知心之臭舌者心竅也而知脾之味耳者腎竅也而知肺之聲目自知肝色脾苦無知焉其理安在難經謂辛金生子故聲入腎竅下火生酉故臭入肺竅信如此言則乙木生午舌當辨色癸水生卯目當出液今推之于舌于目則不然非的論也愚謂五藏相連近者受氣肺近心故鼻知臭心近脾故舌知味脾居中統四不局一行近肝而剋于肝剋者不受還色于肝故目知色腎下極則反上上通於肺故

耳知聲腎液無所受附齒寄脾故出口也蠡海  
錄謂陽金死子而陰金生故耳知聲陽火死酉  
而陰火生故鼻知臭于舌知味處不能通亦非  
的論云

蘇長公譏揚雄好爲艱深之辭以文淺易之見  
極中其膏旨而重入者至謂其以太元擬易以  
法言擬論語有僭經之罪亦不足以服其心夫  
聖人之言偶成一體垂之後世何妨爲誦法者  
所效倣左傳本之尚書四言本之三百後人之



文因前人規模者何限若夫辭有繁簡製有多  
岐則踵事而漸增者耳卽如尊經翼聖莫如朱  
紫陽而綱目一書全擬春秋且以託始威烈爲  
直接麟經之嫡統者又何以解乎故曰不足以  
服其心也若以規規摹襲畧無生韻間後世擬  
託之濫觴爲子雲嘲笑則可耳罪之僭經知平  
反蓺茹者當必爲之未減矣彼易林亦屬擬易  
而文辭奧異爲後世所推重亦未聞其以僭經  
罪也○蘇明允作春秋論謂孔子以天子之權

言景  
予魯未嘗自作而遷固之史有是非而無賞罰  
史臣之體宜爾至未則曰後之效孔子作春秋  
者吾惑焉謂其賞人功赦人罪去人族絕人國  
而貶人爵皆天子之權而非他經可比也況進  
退天子之爵號乎以此言之則紫陽僭經之罪  
似浮于子雲此語未是

予嘗自坐一室見几上銅爐僅有火未嘗薰香  
而霏霏若有烟氣微香時來撲鼻因細察之蓋  
爐之有覆蓋者蓋上鑿花使其玲瓏空洞烟從



隙中出歲久烟多熏積蓋上可錢大餘一片色  
如漆面下者潤類脂有光以火著灰中炎蒸黑  
脂處如蕪香者然但較香篆稍微細氤氲之間  
清靄髣髴睇目良久嫵如輕綃追而視之蓋無  
有也香氣擬沈水初蕪未火時異馥芬然有踰  
郁烈蓋黑脂處皆香之精液所凝結故特爲妙  
異如此因悟香臭之達于鼻雖本無形皆有若  
可見者冉冉而至以其氣分清虛運之速而人  
不目覩耳

昔人云唐人詩有八百家宋洪景盧集萬首唐  
絕僅見五百家若今日流傳于世者不過二百  
家耳虞山先生嘗爲予言丙戌年在都門于灰  
燼中檢出宋刻唐詩數冊乃宋人趙氏所彙集  
分門別類無體不備自序言其家藏唐人詩集  
千家彙成此書計全書可五百餘冊虞山所得  
不過天文等一二類中多未見詩如薛濤世但  
傳其絕句耳此中載濤律詩甚多他可類推其  
書是明仁宗東官所閱上有監國之寶後先生



絳雲樓災并此數冊亦不可得見矣世上奇書  
秘籍所不傳者何限而腐爛之文集無稽之紀  
錄濫惡之時文鄙俚之詞曲反有傳者亦可慨  
也

近人著述凡博古賞鑒飲食器其之類皆有成  
書獨無言及營造者宋人李誠之有營造法式  
卅卷皆徽廟宮寅製度如艮岳華陽諸宮法式  
也聞海虞毛子晉家有此書凡六冊式皆有圖  
款識高妙界畫精工竟有劉松年等筆法字畫

亦得歐虞之體紙板黑白之分明曰世所不能  
及子晉翻刻宋人秘本甚多惜不使此書一流  
布

樊宗師文詰屈聱牙志今所駭今世僅傳其越  
王樓序絳守居園池記一二篇而已韓退之爲  
其墓誌稱其有文三百餘卷生平之著述亦多  
矣乃卒不傳句曲張菊人大令嘗于河北逆旅  
人家敗簾中見有樊宗師文一冊是寫本蟲穿  
蟻蝕半皆朽蠹以意繹之大抵皆序記類語也



詩文必平暢典則始可傳遠如樊之作其不傳也宜哉

河北有層山山甚靈秀山峰之上立石數百丈  
亭亭桀豎競勢爭高遠望簌簌若攢圖之託霄  
上其下層巖峭舉壁岸無階縣崖之中多石室  
焉室中若有積卷矣而世士罕有津逮者因謂  
之積書巖巖內時見神人往還蓋鴻衣羽裳之  
士練精餌食之夫耳

水經注

虞山先生有津逮

軒毛子晉津逮秘書皆本此也

三

三



